

Newspaper	UTUSAN MALAYSIA
Date	7 FEB 2015

# Indonesia setuju inisiatif Malaysia wujudkan zon waktu ASEAN

UM  
7/2/2015

**PUTRAJAYA 6 Feb.** - Malaysia dan Indonesia mencapai kata sepakat untuk mempertimbangkan langkah mewujudkan zon waktu ASEAN sebagai salah satu bentuk penyatuan di rantau ini.

Presiden Indonesia, Joko Widodo berkata, pihaknya bersetuju dengan inisiatif itu yang dicadangkan oleh Malaysia dan sedia melakukan perbincangan lanjut mengenai perkara itu dengan segera.

“Kesepakatan mengenai zon waktu ASEAN adalah simbolik penyatuan dalam ASEAN. Oleh itu, haruslah segera dilanjutkan dalam kalangan negara ASEAN,” katanya.

Beliau berkata demikian dalam sidang akhbar bersama Perdana Menteri, Datuk Seri Najib Tun

Razak sempena lawatan rasminya ke Malaysia, di Bangunan Perdana Putra di sini hari ini.

Baru-baru ini, Menteri di Jabatan Perdana Menteri, Datuk Seri Abdul Wahid Omar berkata, Najib, telah mencadangkan agar diwujudkan satu zon waktu standard dalam beberapa perbincangan dengan rakan-rakan ASEAN supaya dapat merencanakan aktiviti perniagaan dan pelaburan dalam kalangan negara-negara ahli.

Cadangan tersebut kemudiannya turut dibincangkan dalam sesi Pemukiman Menteri-Menteri Luar ASEAN yang berlangsung di Kota Kinabalu baru-baru ini yang antara manfaatnya dapat mengukuhkan hubungan perniagaan dan

kerjasama antara kerajaan dalam ASEAN dan negara-negara lain di Asia.

Pada masa sama, zon waktu seragam akan membolehkan lebih banyak masa bagi tujuan komunikasi, menyelaraskan aktiviti pasaran saham, meningkatkan sistem operasi penerbangan dan menambah baik rangkaian perniagaan serta perbankan di rantau ASEAN.

Dalam pada itu Najib berkata, tujuan mewujudkan zon waktu seragam adalah bagi memudahkan perniagaan dan integrasi dalam kalangan negara ASEAN.

“Langkah ini merupakan satu solidariti ASEAN dan memudahkan urusan perniagaan dalam kalangan negara ASEAN,” katanya.